

Naqqiut
(Akissuteqaat 11.april 2014-meersoq taarserpaa)

Meeqqat inuusuttullu 16-iniit 24-nut ukiullit annertuumik innarluutillit KalaallitNunaata avataani uninngagallartut ukiumut marloriarlutik Kalaallit Nunaannut tikeraarluni angalanermut pisinnaatitaaffeqassasut erseqqissaavigeqqullugu qulakkeerneqaqqullugulu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Agathe Fontain, Inuit Ataqatigiit)

Akissuteqaat

(Ilaqutariinnermut Inatsisinillu Atuutsitsinnermut Naalakkersuisoq)

Siullermeerneqarnera

Naalakkersuisut siunnersuummut qujapput.

Iisimatitsissutigineqarsinnaavoq, inuit annertuumik innarluutillit ikiorserneqartarnerat pillugu nalunaarummi, qallunaatut allassimasumi kukkuneqarmat.

Nalunaarutip kalaallisoortaani § 56-miittumi allassimavoq meeqqat inuusuttullu 16-iniit 24-nut ukiullit annertuumik innarluutillit Kalaallit Nunaata avataani uninngagallartut ukiumut marloriarlutik Kalaallit Nunaannut tikeraarluni angalanermut pisinnaatitaaffeqartut. Nalunaarutip qallunaatuannili periarfissatut kisimi allaqqalluni.

Maannakkut sulissutigineqarpoq, nalunaarutip qallunaatoortaa erngertumik allangortinneqarnissaa.

Innarluutilinnik isumaginninnerup 1. januar 2011-mi nuunneqarneranut atatillugu Namminersorlutik Oqartussat KANUKOKA-llu akornanni isumaqatigiissuteqartoqarpoq. Nuussineq pillugu isumaqatigiissummi allassimavoq nuussinermik naliliineq kingusinnerpaamik 2014-imi naammassisimassasoq. Maanna naliliisoqaleruttorpoq.

Naalakkersuisooqatigiinnissamik isumaqatigiissummi allassimasutut nunatsinni innarluutillit innuttaasut allat naligalugit innuttaasuunerat Naalakkersuisunit pingaartinneqarpoq. FN-ip innarluutillit pillugit isumaqatigiissutaa naapertorlugu innarluutillit pisinnaatitaaffii qularnaarniarlugit Naalakkersuisut aamma suliniarput. Aammattaaq inunnut annertuumik innarluutilinnut ilinniagaqartitsinissamat suliffeqartitsinissamullu periarfissaqarnerulersitsinissamat Naalakkersuisut pisussaaffeqarput.

Taamaattumik innuttaasut innarluutillit atugarissaarnerulernissaat Naalakkersuisut ilungersuutiguarniarpaat.

Naalackersuisut suliniummut aallarniisutut tapersersorneqarnertik nuannaarutigaat, suliamullu aallartisareersumut siunnersuuteqartumut qujavugut. Qulaani allassimasutut oqaaseqarlutik siunnersuut taama isikkoqartillugu akuersissutigineqarnissaa inassutigalugu.